

~~Oh L 5402.2/2902.BB~~

T 5404/2902B

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

MAY 14 1932

JUN 28 1932

重刊原本

高季迪先生

全集

竹素園藏板

重訂原本

高季迪先生
大全集

竹素園藏板

御覽本

大正

人全
故
上
今

大全集序

故嘉議大夫戶部侍郎前翰林國史院編修官授諸
王經青丘先生高啓文集一十八卷舊一千若干篇
今二千若干篇儒士徐庸字用理之所廣也用理旣
以類廣先生文集乃以示昌昌謹爲序之曰夫將以
所學明先王之道救當世之弊則必著於言焉庶幾
見者之用聞者之有考也六經更聖人之手其言粹
然一出於正要之所以存鑒戒者亦多聖人旣歿縱
橫押闔之說興大道幾微漢廣游學之路董生賈誼
始各以其學自見著書數千萬言沉雄簡奧其明先

王之道陳當世之務略備矣唐韓愈起力變八代之
衰習故其言惟醇而杜甫李白又各以其學自見明
王道具時政謂之詩史宋歐陽修博學力行本論之
言有益於治至朱元晦則根據六經之旨攘斥百氏
之非巋然為世儒宗其大要使人審王伯之略致義
利之辨而已今諸家之言具存考之可知用之猶尚
可行也蓋三代而下漢唐宋之所以聳德著業而繼
焉以稱治者有賴於是焉先生生元丙子少稟神慧
長讀六經諸家之言融而通之會而成之又取而力
行之其發之於言則浩乎如大川之決防也鏘乎如

洞庭之張樂也儵乎如幽壑之舞蛟也致之於用則
如射者之於的準乎其無疑也然值國步之既促不
苟於用隱於青丘登高望遠撫時懷古其言多激烈
慨慷若將於世無足為者及我太祖高皇帝定鼎建
業肆詔徵賢先生起與元史之修錄善醜惡儒者之
功庶幾彰施史成授諸王經進戶部侍郎尊顯極至
先生感之力頌先王之道以匡濟世務言多雄偉奇
古足以聳張德業裨益治化時甚賴之未久即辭去
去後亦蹇連以死嗚呼殆天所以厄斯文也嘗竊論
焉天道惡滿取之不可以全然誣其身則必信其聲

是以董賈貶逐而名長甫白窮放而詩傳韓愈歐陽
修朱元晦雖號通顯而未免罷斥然其言至於今誦
習而師承者不衰正柳宗元所云生而不遇死則垂
聲者衆也先生死始三十有九使少優游而待之則
得將止於是乎言將止於是乎行將止於是乎嗚呼
天實爲之謂之何哉用理師學於先生之言得之既
深邃勒圖傳之亦使聞者考之而可知見者用之而
可行以明其言之果有賴於世也嗚呼厚矣

景泰元年庚午冬十二月望日賜進士出身吳劉昌

序

(254)

高季迪先生大全集總目

卷之一

樂府一百零三首

卷之二

樂府六十八首

琴操四首

辭三首

三言一首

三四言一首

卷之三

五言古詩八十八首

卷之四

五言古詩八十四首

卷之五

五言古詩六十八首

卷之六

五言古詩九十一首

卷之七

五言古詩五十八首

卷之八

七言古詩四十二首

卷之九

七言古詩四十三首

卷之十

七言古詩四十九首

卷之十一

長短句體四十一首

卷之十二

五言律詩一百八十三首

卷之十三

五言律詩七十九首

五言排律二十三首

卷之十四

聯句六首

六言律詩九首

七言律詩七十一首

卷之十五

七言律詩一百五十首

卷之十六

五言絕句一百八十八首

卷之十七

七言絕句一百六十一首

卷之十八

七言絕句一百六十三首

青丘高先生所著詩甚夥當時行世者有吹臺集
岳鳴集江館集鳳臺集婁江吟稿姑蘇雜詠等編
明景泰間徐用理先生彙而刻之共得樂府近體
詩一千七百七十餘首名曰大全集凡使後之賞
音者無遺珠之歎云爾自後簡編銷蝕傳者絕少

獨缶鳴一集已刊行於世較之茲刻詩僅十之五
六而姑蘇雜詠不與焉今板已漫滅頗多舛譌披
覽之下不無遺憾乙亥春購得茲本因而重加校
讎其間序次悉遵原板間有闕文一二亦姑仍之
而未敢遽改嗚呼既備一家之言又無三豕之謬
可謂盛矣不敢獨秘公之同好至於詩格高妙則
自有知音者在奚煩予之贅言

竹素園主人謹識

高太史傳

高啓字季迪吳郡人生元丙子少警穎力學遂工於
詩上窺建安下逮開元大曆以後則蘄之天資秀敏
故其發越特超詣擬鮑謝則似之法李杜則似之庖
丁解牛肯綮迎刃千彙萬類規模同一軌山龍華蟲
如其貴也象犀珠玉如其富也秋月冰壺如其清也
夏姬王嬙如其麗也田文趙勝如其豪也鳴鶴翔雲
如其逸也仍和陶韋大羹玄酒之味不閑二宋粟布
之征所謂前齒古人於曠代後冠來學於當時者矣
東吳騷雅士悉推之無嫌爲文尚氣多辨難攻擊之

體讀之疊疊忘倦大抵以先聲掩其兼美張士誠有
浙右時羣彥多從仕者啓獨挈家依外舅周仲達居
吳淞江上歌詠終日以自適焉陪臣饒介之丁仲容
輩以詩自豪及見啓爲歎服啓尤好權略論事聳人
聽故與饒如授左契定交者若王彝楊基杜寅張憲
張羽周砥王行宋克徐賁之徒胥不羈瞻才爽邁有
文談辨華給憫然以爲天下無人一時武勇多下之
明興以某臣薦偕謝徽等聞於朝與修元史授翰林
國史編修官復命教授諸王久之推任喉舌之司待
以不次與徽等懇辭乞歸田里制可仍賜金以還復

居江上遨遊青丘甫里之墟始號槎軒又號青丘子
鏡志亦不少衰矣居幾何忽從故時一二俠人遊於
郭適江夏魏觀爲郡老而好士延見王彝輩啓嘗會
於京尤禮遇之不得已亦廁爲客復強辭之歸故里
殊悒悒不樂遂蹇連以致年甫三十九嗟乎使啓少
延則駸駸入曹劉李杜之壇奚止此哉其詩類藁藏
於家未即顯初富商陳寶生欲爲壽諸梓啓不許乃
止凡傳錄而誦之者無不歆羨必不泯焉予與啓同
里知其人爲詳故特爲傳以貽不朽云

洪武乙卯二月隴西李志光書

高季迪先生大全集卷之一

古樂府

上之回

聖主重行幸六虯法乾旋北巡初避暑東祠已祈年
 羣官從清塵粲若星麗天前揚豹尾竿左靡魚須旃
 翰海通漢月蕭關絕胡煙願奉千齡樂皇躬長泰然
 君子有所思行

騁望京輔地金城千里餘
 峩峩松柏陵靄靄桑柘墟
 明堂表青陽飛觀切紫虛
 况有戚里第高樓夾清渠



愛妾舞羅縠嬖奴鳴珮琚東園賜祕器上林乘副車
玄運有恒旋盛時無久居勿嗤城南巷寂莫揚雄廬
李夫人歌
延年罷歌少翁望蘭芬淒淒銷復帳臨歿最難忘
歛不相嚮陳杯觴列燈火是耶非幄中坐新宮漏殘
星欲墮

古別離

他人豈不別所別諒有由嗟君今何營輕薄好遠遊
遙遙京洛車汎汎江漢舟君身非賈胡所至自輒留
徽音已冥邈思懷尚綢繆露滋紅蘭春霜變綠桂秋

此時望歸來含情上高樓川途本無限君去焉得休
願令中斷阻化彼山與丘

燕歌行

清商變節朱火違嚴霜塗庭卉木腓邊城早寒未授
衣念君遐征不能歸涼風時來動中闈蠟蛸在戶熠
耀飛賤妾宵興歎無依簪珥不施減容輝欲寫憂思
撫瑤徽君今不在聽者稀啓明未出燈已微愛而不
見徒歔歔

吳趨行

僕本吳鄉士請歌吳趨行吳中實豪都勝麗古所名

五湖洶巨澤八門洞高城飛觀被山起游艦沸川橫
土物既繁雄民風亦和平泰伯德讓在言游文學成
長沙啓伯基異夢表休禎舊閩凡幾家奕代產才英
遭時各建事徇義或騰聲財賦甲南州詞華竝西京
茲邦信多美粗舉難備稱願君聽此曲此曲匪誇盈

南山有鳥

南山有鳥北山羅兩地一失驚風波哀鳴獨宿心靡
他竟抱幽恨歸山阿不及山上松纏綿同女蘿君歸
來聽妾歌相思感君情意多贈君明珠淚滂沱死生
茫茫終奈何

玉波冷雙蓮

金風暮剪雙頭藥啼臉辭秋媽血紫宮女三千罷笑
喧錦雲障冷鴛鴦死滿江煙玉流古香尋魂弔影愁
茫茫吳天墜露衰紅溼一夜波涼小龍泣

藥秀葯華

春香上羅襦暗引蘭橈渡蝶散掩紅房王孫歸已暮
斜條拂蛾鬢采擷同芳杜脈脈雨煙濃江臯斷腸路

吳鈞行

吳鈞若霜雪吳人重遊俠罇前含笑看上有仇家血

短歌行

置酒高臺樂極哀來人生處世能幾何哉日西月東
百齡易終可嗟仲尼不見周公鼓絲拊石以永今日
歡以別虧憂因會釋燕鴻載鳴蘭無故榮子如不樂
白髮其盈執子之手以酌我酒式咏短歌爰祝長壽
白馬篇

白馬銀鏤鞍流光皎如練龍沙積雪裏一去誰當見
昨日羽林兒獨拜建章殿天子親賜與騎向交河戰
疾驅不辭家恐獲逗遛譴萬里倏若飛神速虜難變
前收日逐屯右斷康居援事定入關來箠中有餘箭
宛轉行

宛轉復宛轉宛轉日幾迴君腸鹿盧斷我腸車輪摧

長門怨

憎寵一時心塵生舊屋金苔滋銷履迹花遠度鑿音
暮雀重門迴秋螢別殿陰君明猶不察妒極是情深
班婕妤

微誠雖可守妙舞却難工已別增成舍初來長信宮
扇歸秋篋裏燭滅夜帷中莫忘爭新寵曾辭玉輦同

閭闔篇

天門迎旭開紫霞八表洞達春無涯閣道縈迴度鸞
車羽旗揚彩鐘鼓擗後宮三千人秀色掩盡世上花

宸遊時過廣成家。瑤觴再壽盛露華。一仁興萬福。加
何須慕神仙。辛勤鍊丹砂。小臣微詞欲拜獻。帝德自
大非爲誇。

塞下曲

日落五原塞。蕭條亭堠空。漢家討狂虜。籍役滿山東。
去年出飛狐。今年出雲中。得地不足耕。殺人以爲功。
登高望衰草。感歎意何窮。

折楊柳歌詞 二首

高枝拂翠幘。低枝垂綺筵。春風千萬樹。此樹妾門前。

其二

江頭橫吹悲北客。休南去聞道武昌門。愁人無別樹。

空侯引

濁流赴海東。若傾津卒刺。船朝不行。公乎提壺徑欲
渡。大聲呼公公不顧。飢鯨饞蛟肆啖吞。竟以深淵作
高墳。貪生惡死誰不有。公獨不然果狂叟。二十五絃
彈且歌。公今渡河將奈何。公今渡河將奈何。

將進酒

君不見陳孟公。一生愛酒稱豪雄。君不見揚子雲。三
世執戟徒工文。得失如今兩何有。勸君相逢且相壽。
試看六印盡垂腰。何似一卮長在手。莫惜黃金醉青

春幾人不飲身亦貧酒中有趣世不識但好富貴亡
其真便須吐車茵莫畏丞相嗔桃花滿谿口笑殺醒
遊人絲繩玉缸釀初熟搖蕩春光若波綠前無御史
可盡歡倒著錦袍舞鸚鵡愛妾已去曲池平此時欲
飲焉能傾地下應無酒壚處何苦寂莫孤平生一杯
一曲我歌君續明月自來不須秉燭五岳既遠三山
亦空欲求神仙在杯酒中

雨雪

雨雪暗桑乾深愁沒馬鞍臨關將月認覆磧作沙看
不阻胡兒獵聊供漢使餐春風消不得三月戌袍寒

其二

雨雪暗龍沙愁陰入漢家恨迷青冢草驚見黑山花
夜積檀廬重朝隨羽旆斜空思鳩鵲觀柳色變年華

羅敷行

陌上三月時柔桑多綠枝攜筐行采葉日暮畏蠶飢
君來駐車馬相逢在桑下謾說同心言不是知音者
君貴多輝光妾賤無紅妝自信田間婦難從天上郎
長安畫樓宇無限如花女使君當早歸莫共羅敷語

當壚曲

光豔動春朝妝成暎洛橋錢多自解數箠澀未能調

花如秦苑好酒比蜀都饒深謝諸年少來沽不待要
遊俠篇

遊俠向何處蕩蕩長安城城中暮塵起殺人無主名
所殺豈私讎激烈為不平新削安陵刀光奪衆目明
不畏赤棒吏里閭自橫行灌夫託為友袁盎事以尤
負氣不負勢傾身復傾情笑顧少年輩瑣瑣真可輕

關山月

月出遼海東朔雲捲胡風纔升榆塞遠復照柳城空
影滿雕弧外光沉金柝中思家舉頭望今夜一軍同

鞠歌行

玉蘊彩劔閔鋒牛鐸之音混黃鐘俾神奇作妄庸揚
微察陋世罕逢物有合勢必從如魚得水雲與龍夷
吾囚伊尹農二主舉之享萬鍾嗟古人孰繼蹤女子
猶為悅已容

古詞

妾刀不斷機郎行當早歸還將機中錦作郎身上衣

王明君

都門塵拂春風面臨別看花淚如霰君王惆悵惜蛾
眉不似前時畫中見白髮呼韓感漢恩寧胡謾號關
支尊羶裘肉食本異俗不如但嫁巫山村黃沙白雪

無城闕。手冷鴟弦夜。彈歇相隨萬里到。穹廬只有長
門舊時月。妾語還憑歸使傳。妾身沒虜不須憐。願君
莫殺毛延壽。畱畫商巖夢裏賢。

鳥夜啼

啼鳥驚多棲未久。半起疎桐上高柳。燈下佳人顰淺
眉。機中少婦停織手。月入空閨夜欲深。數聲猶似聽
君琴。

行路難

君不見盤中鯉。暫失風濤登俎几。君不見枝上蜩。纔
出糞壤凌雲霄。推移變化詎可測。勿謂明日同今朝。

出乘高車入大馬。半是當年徒步者。范叔曾逃客溺
餘。衛青亦在人筓下。悠悠行路莫相欺。爲雌爲雄未
可知。

其二

危莫若編虎須。險莫若觸鯨牙。行路之難復過此。前
有瞿塘後褒斜。杯酒朝驩矛刃夕。加恩仇反覆間。楚
漢生一家。釣弋死雲陽。鴟夷棄江沙。所以賢達人。高
飛不下避罔罟。行路難堪歎嗟。

其三

雕牀玉案刺繡茵。宜城酒多光照春。坐畱北方之上

客歌侑南國之佳人。盛時徂流若川水。榮貴長存竟
誰是。魏帝高臺碧瓦空。梁王故苑黃塵起。世人傾奪
首未廻。可憐不飲冢累累。

劉生

結客諸陵下。平生好排難。鶉瑩白楊刀。鵲驚黃柘彈。
投瓊遠邸夜。擊筑高樓旦。念無可報恩。空推車辟歎。

怨歌行

妾始充下陳。嬌容常自持。上宮三千妓。一一妒蛾眉。
絃急有斷聲。鏡暗無妍姿。遂令開時花。遽作落後枝。
昨夕歌吹歡。今夕蛩語悲。從來班婕妤。不勝趙昭儀。

雉子班

雉子班。雉朝陽。低飛蓬蒿隱。文章五步一。啄于彼山
梁。爭雄決鬪。憤氣張。好勇守介性之良。安能受馴畜。
斂翼自摧傷。

蒿里

素驂駕廣柳。蕭蕭出城闈。玄廬儼象設。猶恐死有神。
古原閉愁窻。荒草不得春。一作泉下客。長違室中親。
昔興每待旦。今卧焉知晨。斂衣已成灰。含具仍作塵。
家門諒不遠。欲歸竟何因。平生所愛物。娛玩由他人。
哀哉此里中。同逝壯老均。聖賢亦豈免。聞道庶可珍。

薊門行

行行光祿塞望望單于臺天寒水草盡萬里孤軍來
中國多荒土窮邊何用開

巫山高

巴江西上巫峽深奇峰十二江之陰陽雲高臺不可
尋但見丹楓碧樹攢幽林昔聞瑤姬在其下月為環
玦風為襟空山久獨居偶感襄王心楚宮閉秋夢彷彿
來同衾神仙會遇當有道豈效世俗成荒淫千秋
遺賦應多恨暮雨蕭蕭後自吟

上畱田

有弟兄不見憐上畱田行泣念彼先人上畱田弟寒
衣不蔽身上畱田兄富出乘華軒上畱田死而棺槨
不全上畱田他人為葬古原上畱田我行見此孤墳
上畱田白楊一何翻翻上畱田人生孰無弟昆上畱
田爾獨大義不敦上畱田鄰人之歌悲不可聞上畱
田

董逃行

史侯稱臣董侯立山東義師烽火急羌兒夾輦奉西
遷百姓驅隨棄村邑華圭苑中高作營千里不復聞
雞鳴舊宮焚燒無片瓦黃金盡出諸陵下長安城頭

日欲晡。董逃歌殘。歌布乎。

碧玉歌

碧玉小家女。初無珠翠妝。感郎相顧重。朽質自生光。

堂上歌行

堂上歌。歌南山主人爲歡。仰客顏。翠帷夜卷出兩鬟。移尊更飲花樹間。花樹間有明月。客不醉。歌不歇。

隴頭水

人間何處無流水。偏到隴頭愁入耳。夜雜羌歌明月。中秋驚漢夢。空山裏。隴坂崎嶇九迴折。聲隨到處長。嗚咽欲照愁顏。畏水渾。前軍曾洗金創血。回頭千里。

是長安。征人淚枯流不乾。

少年行

官侍長楊拜夕郎。况憑內寵在椒房。賜金十萬身無用。乞作胡姬一日妝。

其二

下直平明出禁門。笑提博局伴王孫。寶刀不敢將輸却。明日沙場欲報恩。

芳樹

葳蕤映華闈。窈窕臨清沼。風姿巧弄春。露氣微含曉。垂條拂過騎。翳葉畱歸鳥。忽憶共攀人。徘徊行獨遶。

放歌行

泰山玉檢書成功，芝房正奏甘泉宮。漢家五葉號全盛，有似白日初當中。雄雞天上啼清曙，春滿咸陽萬家樹。諸侯客子盡西來，只道明時苦難遇。褐衣不脫見至尊，立談一刻皆承恩。賡詩已上柏梁殿，獻賦還過金馬門。大道易登平若砥，始信青雲纔尺咫。共喜巖徐得寵榮，未容絳灌生讒毀。丹詔仍聞訪草萊，皇心務欲攬羣材。嗟君猶在新豐邸，日暮空歌歸去來。

空城雀

空城雀何局促，城頭飛城下宿。百匝得一枝，千啄逢

一粟。衆雛隨啾啾，所欲各易足。不須羨彼珍羽禽，翩翩高集珠樹林。一朝身陷虞羅裏，回首空城不如爾。

相逢行

沽酒渭橋邊，平陵俠少年。相逢各有贈，寶劍與金鞍。
妾薄命

寂寞復寂寞，秋風吹羅幕。玉階有微霜，桂樹花已落。昔爲卷衣女，承歡在瑤閣。棄魚感淚多，當熊慙力弱。寧知色易老，難求黃金藥。宮深去天遠，憂思將何託。君恩非不深，妾命自輕薄。微軀願有報，和親死沙漠。

神仙曲

上清真人古仙子。保神鍊魄從無始。眉上霜毫如髮
長。幾見金烏日中死。東遊不肯居蓬萊。滄海頃刻飛
黃埃。金輿玉座儼何處。鬱藍天上彌羅臺。碧桃落盡
花無數。一笑虛空卷煙霧。鳥篆玄文世莫窺。茂陵還
掩蓬科露。

結客少年場行

結客須結遊俠兒。借身報仇心不疑。千金買得利七
首。摩挲誓許酬相知。白馬縵胡纓。行行人盡止。朝遊
洛北門。暮醉秦東市。感君在一言。不惜為君死。朱家
曾脫季將軍。田光終酬燕太子。君不見魏其盛時客。

滿門自言一一俱銜恩。魏其既罷誰復見。養士堂中
塵網遍。始知結客難。徒言意氣傾南山。食君之祿有
弗報。何況區區杯酒間。結客不必皆薦紳。緩急叩門
誰可親。屠沽往往有奇士。慎勿相輕閭里人。

長相思

長相思。思何長。愁如天絲遠。悠揚搖風曳。日不可量。
未能絆去足。唯解結離腸。關山碧雲看欲暮。空幃坐
掩荃蘭香。長相思。思何長。

君馬黃

君馬黃。我馬玄。君馬金。臣我馬錦。連乾兩馬喜。遇

皆嘶鳴何異主人相見情
長安大道可竝轡莫誇得意
爭先行搖鞭共踏落花去
燕姬酒壚在何處

團扇郎

團扇團且潔人言似明月
明月明月豈得如長圓不
曾闕

楊白花

楊白花太輕薄不向宮中飛
却度江南落美人踏踏連臂
歌山長水濶奈爾何奈爾何
春欲晚何不飛去仍飛返洛
陽樹多啼鴉愁殺人楊白花

門有車馬客行

門有車馬客乃是故鄉士
昔別各壯顏今見不相似

上堂敘情親拜跪出妻子對
案未能食歷歷問桑梓當時
同遊人十有八九死松柏長
新墳荆棘生故址歡言方未
終悲感還復始因思興謝端
歎息不能止

估客詞

上客荆州商小婦揚州娼
金多隨處樂不是不思鄉

權歌行

溶漾漢潭清牽荷趁浪平
船輕知體弱簪滑見鬟傾
落日懸江思浮雲結浦情
去從千葉隱歸愛一花迎
吳歛并子夜誰似棹歌聲

雞鳴歌

北斗城頭北斗低，萬家夢破一聲雞。
馬蹄踏踏車輪轉，闕下連趨市中逐。
雄雞安得噤爾聲，利名少息世上爭。
漫漫夜長人不驚。

華山畿

華山畿，牛車止不同生，可同死。
棺開棺開，與郎去來。
長安有狹斜，狹斜僅容騎。
路逢兩俠童，迴鞭問君第。

君第渭橋西，易覓難復迷。
長子侍溫室，次子籍金閨。
少子備宿衛，光耀與兄齊。
三子每來返，雜沓擁輪蹄。
大婦彈鷓鴣，中婦舞前溪。
小婦勸杯酒，能唱白銅鞮。

丈人莫遽起，庭樹未烏棲。

雙桐生空井

交生碧玉樹，竝覆黃金井。
根通夕潤深，葉帶朝光冷。
應有感秋人，時來鑑愁影。

征婦怨

良人不願封侯印，虎符遠發當番陣。
幾夜春閨惡夢多，竟得將軍軍覆信。
身沒猶存舊戰衣，東家火伴爲收歸。
妾生不識邊庭路，尋骨何由到武威。
紙幡剪得招魂去，只向當時送行處。

襄陽樂

門前黃柳鴉雛宿羅幌低垂婢擎燭懸璫結珮略妝
成日莫相邀漢江曲水靜花寒月小明舟中樓上鬪
歌聲腸斷年年大堤路南商行過北商行

飲酒樂

七絃五絃角奏一觴兩觴羽行且樂眼中人聚莫憂
頭上天傾

鳳臺曲

飛裙織霧秋痕薄星漢低宮花漠漠瓊臺夜寒閉羸
女鶯管參差隔煙語瑤京舊侶招遠遊人間帳冷鴛
鴦愁海影無塵月如夢仙骨不欺鸞昔重衰蘭泣露

空秦苑叢玉聲微彩霞遠

美女篇

美女婉清揚白晳纖且長艷色照上國不殊古姬姜
巧笑發令姿芳詞吐柔腸耀首有何物黃金作釵梁
珥懸礫珂珠禕帶霍納香新服製羅紈光輝麗青陽
上袂繡蛺蝶下裙織鴛鴦姍姍步春風乍見驚欲翔
雖有楚大夫善賦焉能詳豈徒騁妍媚况乃持貞良
家居闕高門宛在城中央過者共傾慕日晏停上襄
借問誰氏子無非金與張蹇修豈不勤通辭重珪璋
中懷非所託鴈幣徒相將永宵歎遲回起倚東西廂

君子苟未得年祖諒何傷

將軍行

將軍結髮從鞍馬新領前軍號橫野面謾不數屠狗
兒負勇曾擒射鵰者狼星掃天芒角斜大旗獵獵吹
風沙黃金傾盡養部曲匈奴未滅何爲家前日賢王
五千騎直入朝那殺邊吏天子初聞怒赫然出師誓
奪河南地五營材官元白多詔書未須徵七科已御
明堂推畫轂還開武庫授彫戈灞陵原頭軍晚發北
出雲中與高闕單于一夜六騾逃大漠無人唯漢月
塞下從茲烽火稀朝臣共負震皇威人生寧似功成

樂白日長安鼓吹歸

長安道

長樂鐘聲動平津樹色開中郎長戟衛丞相小車來
新成賜將第更築候神臺誰念公車客空懷作賦才

洛陽陌

九陌看春光紅塵起相接白玉車中郎綠珠樓上妾
柳迷臨水影花暎當壚頰日暮過銅駝相逢盡豪俠

悲歌

征途險巖人乏馬饑貧少不如富老美遊不如惡歸
浮雲隨風零亂四野仰天悲歌泣數行下

邠鄆郭公歌

郭公舞郭公舞。天子無愁亦無苦。醉後君臣一笑看。
鄆宮長夜蓼蓼鼓。郭公郭公爾莫舞。不解平城圍。竟
作長安虜。高山摧為一杯土。

車遥遥

鷓鴣啼霜海城白。征夫趣裝牛上輓。天生兩轂轉長
途。那得令君不為客。出門已遠第一程。耳中鳴鐸漸
無聲。房戶寧嗟寂莫守。山川唯念苦辛行。欲車不行
驥車覆。還愁損我車中玉。安得身如芳草多。相隨千
重車前綠。

楚妃歎

章華臺前楚江水。月色墮煙鳥欲起。六宮不敢解羅
衣。獵火照山君未歸。

神絃曲

秋燈畫屏熏煙埃。石馬汗流神下來。花衫娑娑絃切
切。旋風吹幡愁百結。雌狐學拜戴髑髏。鬼箭射創血
灑秋老鴉飛散。巫媪泣苦篁嘯雨溪幽幽。

白紵詞

白紵出自吳女工。著來色與素體同。舞時偏向江渚
宮。長袖拂起微有風。鶻催管促四座中。攬裾徘徊慘

曲終玉階夜寒零露濃

其二

出後閣臨前楹舞衣皎皎潔且輕飄如白雲向空行
迴腰流目君已傾華燈吐燄欺月明喧譁不聞遺珮
聲茱萸實紅蘭葉紫千秋歡樂長如此妾身得向君
前死

阿那瓌

牛羊草漫野大帳天山下十萬控弦兒聞菰齊上馬

江南意

妾本南國妹父母愛如珠貌豈慙明鏡身纔稱短襦

學成采蓮唱曉出橫塘上舟小復身輕隨風兩搖蕩
歸時曲岸傍恰見貴遊郎輟歌欲轉棹花淺不堪藏
將嗔却成哂相問那能隱雖憐郎意深終嫌妾家近
回首各盈盈南湖月又生煙波三十里都是斷腸情

銅雀妓

鄴宮已罷幸歌舞尚如期誰知看月夜却是望陵時
薶澤銷羅薦松風吹總帷妾身未得死寧當憂色衰

猛虎行

風吹林鳥鵲悲猛虎欲出人先知日光曛曛當路
坐將軍一見弧矢墮幾家插棘高作門未到日沒收

猪豚猛虎雖猛猶可喜橫行只在深山裏

湘中絃

涼風嫋嫋月粼粼竹色蘭香秋水濱一夜猿聲流淚
盡黃陵祠下泊舟人

獨不見

白日沉大荒北風下天霜羅幃猶苦冷何況戍邊陽
別時秦槐青今復胡草黃紅淚常自滋非因效啼妝
鴛機促夜響龍鏡掩晨光相思獨不見時久愈難忘

豔曲

日莫淇水上折花行見歡鴛鴦蘇合彈腰裏鏤衢鞍

其二

當時贈芍藥今日歎薜蘿少年不相顧唯愛執金吾
羽林郎

十五能挽弓入衛葡萄酒宮武皇深假借父有沒邊功
禿衿繡羅短馬逸雙銜斷纜出鬪雞坊還過射熊館
笑擲朱提銀娼樓爛醉春歸時衝市過辟易九衢人
橫行自無避司隸休相忌明日浚稽山爲君遮虜騎

燕燕子飛

燕燕何處飛相見江南路蕢香細雨春柳色芳煙暮
纔從箔外歸復向身前度莫入未央宮身輕有人妒

浮游花

宛宛庭中花。狂風忽吹去無涯。上入逍遙之雲天。下沒慘淡之泥沙。開落本同何足歎。升沉偶異自堪嗟。

野田行

白楊樹下誰家墳。火燒野草碑無文。路傍尚卧雙石馬。行人指是故將軍。當時發卒開陰宅。千車送葬城東陌。子孫今去野人來。高處牧羊低種麥。平生意氣安在哉。棘叢暮雨棠梨開。百年富貴何足恃。維川之琴良可哀。

壯士行

無險非高山。無勇非壯士。半夜殺風來。劔寒燈欲死。

邯鄲才人嫁為厮養卒婦

妾能擬趙瑟。舊得君王眷。更衣直夜房。侍酒登春殿。出宮非故顏。里婦猶相羨。叢臺罷往。夢破屋流螢。見末路多若斯。紛紛貴成賤。

秋風引

嗟爾秋風胡為來。哉奏商律兮瑟颯而悲哀。叩喬柯而隕葉。掃廣路以清埃。入班姬之永巷。過襄王之高臺。瑤琴自鳴。羅幃齊開。馬蕭蕭而嘶起。鴻噉噉以翔迴。使崩雲駭浪振蕩於白日。今忽欲去而徘徊。客有

懷鄉失職而對此者恨盈襟而難裁但欲變天地之
搖落不知感節序之摧頽秋風生歸去來

涼州詞

蓬婆城下淨無花慘慘黃雲漠漠沙卷葉誰將番曲
奏白頭都護亦思家

其二

關外垂楊早換秋行人落日旆悠悠隴頭高處愁西
望只有黃河入海流

虞美人曲

明月帳中泣悲風營外歌彷徨夜驚起何事楚人多

迴燈擁綠髻向劔蹙青蛾效命自無恨君王其奈何

築城詞

去年築城卒霜壓城下骨今年築城人汗灑城下塵
大家舉杵莫住手城高不用官軍守

永嘉行

帝衣濺血忠臣死五部初興屠各子宣陽門外曉吹
笳持戟誰爲衛宮士滿城草綠胡馬嘶內家散作軍
中妻六壘相隨渡河去月明歸夢遂成迷萬里中原
非典午至今人說王夷甫

神女宛轉歌

駐君舟相見盡綢繆已遣大姬傾鑿落復令小婢進
篋篋歌宛轉宛轉意何長願為灰與火同泛玉爐香
其二
解妾珮相貽慰離異愁逐朝霞天際生歡隨秋水江
頭逝歌宛轉宛轉情相續願為絃與軫共奏瑤琴曲

東門行

出東門暮歸來入室四壁空突中無煙甑生埃弱妻
蓬頭稚子瘦使我心下忽有哀安能學東方生空抱
國士才身長七尺齒編貝索米不得取笑哈雞鳴東
門早欲開仗劍當遠去不乘駟馬不復迴妻前撈衣

言君可棄妾奈此呱呱孩君莫憂無糧田中已生棘
君莫憂無裳機中布成尚可裁不須苦慕富貴富貴
多有害蓄賤妾與君生同居死即共作山下灰吾欲
行爲徘徊仰視蒼天重咄哉



